



陽山新錄

長孫部
諸子名

吳中山水奇瑰秀拔陽山又爲吳之鎮去城三十里蟠螭特異以其背陰面陽故曰陽山中有仙跡佛老靈奧之區山人莫詢郡乘不載故遊者不能知雖知不暇悉也余自埭用移家山中岳子素尚丘壑相與沉冥山水志道攸同雖一觴一豆必命輿躋討遂得寺觀者七古跡者四泉石者二晉栢一山房一共十五題題各紀之以詩首以大石近而勝也次以龍祠澄照廢而傷也次以文殊淨明鐘山甌山嘉其偏也又次

曰箭缺曰丹井曰耙石曰仙洞曰墀壁曰水岩
曰晉栢喜其怪而奇也終之以脩綠山房者識
君子之考槃也遂名曰陽山新錄云吳郡顧元
慶序

大石雲泉庵

元慶

丹崖側立山之陽白日翻疑霄漢翔絕磴飛梁
還棟宇短墻曲逕自棕篁山中麋鹿安安下石
上烟霞裊裊長半壁諸公聯石句于今詞翰有
輝光

和

岳倚

一巘凌虛勢欲翔逶迤曲磴繞幽篁山僧入定
青春靜塵客來遊白晝長歸院石雲常棟宇近
簷花藥自陰陽人間我欲除煩惱看取靈珠午
夜光

龍母祠

元慶

神物千年產繆娥依然廟貌此山阿到門自覺
龍蛇動出谷常疑雷雨過異代棟梁歸浩劫只
今松檜孰撫訶邇來太守隨車澍一郡驚看潤
澤多

和

岱

石瀨淺淺山木蒼五湖祠廟接瀟湘靈衣珠珮
無消息桂棟蘭橈有夕陽白酒土人來禱旱絳
幃玉女對焚香季春歲歲龍歸異千古風雲近
草堂

澄照寺

元慶

仙泉古寺白雲隈短杖攀躋搖落時夜靜不聞
遼鶴語碑亡空憶謝濤詩拄撐歲月還孤殿擁
護風雲有繆祠嘯坐莓苔山寂寂一尊斜日有
餘悲

和

岱

秋日荒山自可哀昏冥聊借一銜杯錦開雙壁
雲中削翠積連峰天上來地冷佛香空草木雨
侵龍象半莓苔唐碑宋殿俱零落始信人間盡
劫灰

文殊寺

元慶

虛無指點古招提仄徑千盤欲盡躋仰面霏霏
空翠濕此身冉冉白雲齊庭中宿莽驚麝出拱
上新巢怖鴿棲往日題名何處覓黃昏松檜益
淒淒

和

岱

翠峰高處隱招提，繡壁禪林衆鳥棲。
杯酒升沉看日月，杖藜巖壑動攀躋。
塵心煩惱誰能釋，仙客浮遊我欲齊。
回首上方煙霧鎖，下山松栢思淒淒。

淨明寺

元慶

石逕岩堯碧寺通，老僧終日少迎逢。
停輿隔竹鶯千轉，借榻連峯翠萬重。
一鉢山厨常作供，六時金界自鳴鍾。
廿年中鳥勞塵土，始覺空門萬事慵。

和

岱

石磴盤迴繞上方，傍巖臺殿倚蒼蒼。
堦前銀杏充僧供，爐底松花當佛香。
高嶺星河嘗信宿，下山花竹又斜陽。
却緣婚嫁皈依晚，未得辭家禮法王。

確山道院

元慶

度嶺晶熒碧樹開，杖藜應趁白雲來。
莫言物外浮丘伯，未識山中玄圃臺。
瑤草石壇長歲月，松風澗水不塵埃。
翠房縹緲簫聲發，會把流霞未擬回。

和

岱

縹緲青山碧殿開千峯紫翠一登臺好花忽向
遊人笑浴鳥晴看小澗來雲外酒杯空日月人
間身累亦塵埃蓬丘未遇還丹訣城郭秋風望
忽哀

甌山寺

元慶

南國風高秋可哀空山無伴我重來青林杳杳
數峯出白日荒荒一殿開小逕故教穿竹嶼長
松何意護經臺衰年不厭聞清梵暫省塵緣坐
不回

和

岱

海上風煙白晝哀林中碧寺客同來霜清澗戶
蕉猶綠秋盡山堂菊賸開處世百年真過隙携
壺今日是登臺齊心未可捐身累日暮人間首
重回

箭缺

元慶

兩峯中斷山椒起云是秦皇一鏃穿萬壑松濤
雙屐底三吳風物一尊前濛濛元氣玄厓濕藹
藹高雲翠壑鮮欲酹公孫呼不起晚來幽獨下
蒼煙

和

岱

箭缺中天積翠高諸山西擁似奔濤浮雲客到
春常濕絕磴難躋石更勞一片五湖看落日雙
眸百里見秋毫王喬自有芙蓉杖忽聽仙禽喚
九臯

丁令威丹井

元慶

憶昔鶴仙丁令威尚餘丹井鶴峯陞古苔不斷
侵重碧止水空憐結細漪伏火竟無丹客往操
嬰還有野僧知人間物外俱陳跡華表月明空
爾思

和

岱

仙井依然古寺中試窺一鑑倒晴峯飛花水底
紅猶積古蘚山中綠自封千載無人丹竈滅一
杯留客野僧供我來矯首遼東鶴華表秋雲駐
短節

耙石嶺

元慶

如畫如勝一嶺紆僊人曾此種璠璣莓苔隱見
齒跡古歲月憑凌石理踈崑璞荆璆非昔有桃
花流水是秦餘偶來只恐煙霞闕落日停輿一
笑舒

和

岱

種玉仙人去不返只今花落惟空山奇跡悠悠
白石在齒痕了了蒼苔間高天古寺已千歲曲
逕飛雲時一攀青牛白鹿不可見覽勝題詩真
等閒

鷄峯仙洞

元慶

鷄峯崔嵬半插雲上有靈區斷俗氛背日一門
通窈窕經時四壁濕氤氲丹砂狼藉千年跡異
草紛披五色文我欲幽探啓玄秘却疑人世已
千春

和

岱

管然一洞通林屋遙憶此山開巖初高頂雲門
碧玉杖空腹石牀丹訣書蛟龍不知造物闕天
地故着真仙居我今投迹偶方士白虎青龍爰
駕車

白塢嶺石壁

元慶

塢嶺盤盤客倦躋倚空半壁插連漪故開返照
添新綺旋着歸雲弄晚姿的的珊瑚幽處結濛
濛蘿薜坎中垂買山吾欲終長嘯先向巖前紀
近詩

和

岱

嶺下春雲寺欲迷
山頭春日眼看低
吳儂白堊猶充貢
神爵黃麻徒爾爲
二壁丹青開綺麗
千尋蘿葛拂連漪
堯封禹貢空寥落
茅屋山林有所思

滴水巖瀑布

元慶

翠巖遙望接氤氳
山石稜稜路不分
空外大聲喧白日
風前飛沫濕青雲
無人澗上憐幽草
有客溪中知美芹
茅屋松筠還谷口
只今吾欲避緇氛

和

蒼巖千仞接青雲
巖下懸泉一水分
雨後迅流林谷振
旱時不竭古今聞
稼穡山田需歲稔
品題翰墨動新文
探竒歷異平生事
不覺西林下夕曛

西龍祠古栢

元慶

何年古栢寺門栽
故老相傳東晉來
世短世長忘日月
龍來龍去劇風雷
孤高未信神明力
踳據還輸造物培
谷口秋飈吹子落
種成又見棟梁材

和

岱

古栢蒼蒼東晉栽，無人不道棟梁材。嵌中蜥蜴
龍能化樹杪，風雲氣忽來。身上紫藤留掛錫枝，
間香米落停杯。金沙寶樹消煩熱，紅日清陰坐
不回。

脩綠山房

元慶

脩綠山堂千竹依，寒嵐翠霧交。霏霏閉門卓午，
尊俎集解衣。長嘯風塵遠，菊花對酒叢叢放。木
葉經霜冉冉飛，披豁共君忘。日暮扁舟重待月，
明歸。

和

岱

芙蓉黃菊相因依，故人清尊約不違。谷鳥吟風
日款款，山雲出竹晴霏霏。不愁向市少沽值，且
喜看花無是非。清溪之邊東嶺上，新月照君孤
棹歸。

吳多山水奇勝，而吾寔產斯邦。遊跡頗盡會心
處，或爲圖或爲詩，輟復爲人持去。今落落猶見
於人間。嘉靖己亥九月秋霖雨初霽，山高木空，
乃與大石山人顧君自雲泉庵而北，以至雞籠
甌山東踰白塔嶺，以至確山，澄照南過耙石嶺，
轉而西至淨明寺，復奮趾登箭闕，憇文殊寺，乃

歸余脩綠山房凡茲遊泱旬而止於有仙釋所
居泉石所樂顧君咸紀述而吟詠之余和之共
得七言近體詩三十首繕寫成帙置之几案他
日卧遊小齋亦陽山一公案也漳河岳岱識

嘉靖己亥歲吳郡
顧氏刻梓於陽山
草堂之大石山房

陽山新錄

新情籍敘

吳郡 徐禎卿撰

余少何延大人之惠幸弛負擔緣經術以舉諸
生竊不遜與從事二三君子之末斯人俱有髦
雋材噐角名文墨中居止暱近相與競驅密樂
締金石之固要在不遺吾願識其成言其就白
頭迺究耳但羽翮各蓋靡可品列茲在身後自
有權度之區因綜核志行紬緝如左貽之將來
俾可考焉

新倩籍

唐寅字伯虎雅資踈朗任逸不羈喜翫古書多
所博通不爲章句屬文務精思氣最峭厲嘗負
凌軼之志庶幾賢豪之蹤俛仰顧眄莫能觸懷
家貲微羨而饜習優汰不能自裁日以單瘠跼
然處困啣杯對友引鏡自窺輒悲以華盛時榮
名不立俟河之清人壽幾何恐世卒莫知沒齒
無聞悵然有抑鬱之心乃作昭恤賦以自見又
嘗自論曰嗟乎唐生何志之肆而材之縮邪若
使剖質相明亦足以彰偉觀流薄曜也素伉於

意氣怪世交鄙甚要盟同比死生相護毋遺舊
恩故長者多介其誼槩云

系曰有鳥驕斯高飛提提飲擇清流棲羞卑枝
傲蕩激揚操比俠士超騰踔詭又類君子長鳴
遠慕顧命儔侶猥叙苦辛仍要素辭與子同心
願各不移恒共努力比翼天衢風雨凌敞永勿
散飛天地閉合迺絕相知

文壁字徵明篤好據古洽聞舊事善議論學者
咸高之性專執不同於俗不飾容儀不近女妓
意淡薄儔類有小過時見排抵人有薄技亦往

往歎譽焉述造勤工常矯諸友曰君等並持欵
說而壁獨操翰自苦譬之駉驥泛駕蹇牛負軛
誠不可共語也與諸生朱良育善良育亦卓雅
通古謂壁曰夫祿不能代養榮不能庇身時逝
日莫將愁厄之不勝子其計之壁曰否否命不
可枉時不可忽人生寔難不勤何獲柰何計硜
硜之憂反不困邪子行矣無戾我圖異日當不
苦余言也良育竟深賢之余甚偉其狷志賦詩
以廣之云爾

陸生茨蒿中芬臭不相連朱紫本異色觀者苦

自眩憤憤世俗間方類千萬端君子尚貞詭薄
庶好驕揚磁石能引鍼砥礪乃獨堅鸞鳳不從
羣何況於高賢含和而不同聖哲所稱焉飛蠅
惡熱羹勗哉復何言

邢參字麗文爲人沈靜有醞藉固而不陋嘉遯
城市不急榮祿貧無恒業嘗教授鄉里以著述
自娛無所干伺人皆尚之參志旣高而材學精
美多屈士子僉以參之淑懿有四焉養和靖躁
汪汪德心恬怕處約一何潔操文優氣柔君子
之思奮槩履方恂恂誼士近之不厭遠之有望

是豈爲人者乎余因作歌以申歡慕辭曰

雲中鵠子鳴且蜚三三五五將焉歸歸在外野
獨徘徊從朝無梁暮不炊於何求乎蘆之漪我
將往饋羹中魚將子不饑兮我心愉

張靈字夢晉性聰慧善習技巧家本貧窶而復
挑達自恣不修方隅不爲鄉黨所禮惟祝允明
嘉其才因受業門下嘗作文以勵之關涉篇籍
能潛識強誦文思便敏驕曼可采但恨生命逼
苦遭歷艱困禍殃紛然內無僮僕躬操力作饗
殮不繼父母妻子愁思無聊偃息弊廬喟然長

獻結心鬱志不遂所懷然不能感激立節君子
有所嘲焉其詩曰

咄咄張豎生時命一何迫窘狂趨欲何之家無
斗石儲爲汝戚戚復戚戚撫畜老幼當從何須
晨起弗躑躅且往探囊貲空負文史腹腸枯竟
奚爲寒冬十月裏無重襦短褐聊庇形豈有貂
麗之華衣杵臼不聞春稚子前告饑寧逢猛虎
鬪安忍兒女啼倉浪之天弗用信之賢愚混厚
薄若何徒區區芝蘭輒爲草行當隕塵泥悲哉
悲哉令人瘁思昔在原憲環堵蕭如仲蔚高士

蓬蒿閉居尚繼厥後賢名並驅亂曰漫漫黃河
一何深百尺蟠蛟中夜鳴爲君趣車馳洛京思
將誰從邈無朋飯彼莠芋終何以聊生

錢同愛字孔周早負才惠不受俗訓善文采夸
飾修容軼蕩簡闊雅爲士林所獎嘗挫溺於時
意氣激揚眇然有青雲之思庶騰顯美志爲終
身名惜其不遂廼專精古學諷閱傳記心朗性
明目涉知義彊力自振學有浹洽將沈蓄英華
秀而求實綜成名言貽之同好而已唐生甚信
篤之常謂人曰夫健駒昂昂終爲遠器况志士

少壯奚能有是吾類嘆其知言云歌曰
鑽火木見毀策名神亦疲豈不踰食膽健子甘
如飴匪爲甘如飴男兒寔難爲賢者恤身後愚
夫貪厚貲人生各有重定志靡可移

新倩籍終

今雨瑤華序

蓋聞荆山之玉無翼而飛鬱浦之珠不脛而走
其登於章華稱以結綠雖人莫增其美亦必待
人而舉之我 國家垂憲人文化成天下平治
日久禮樂奄被故有英淑之士體道立言步驟
古雅發揚時風但人無三復之勤家執一隅之
解文人相輕知音難遇岱家世戎勲豈諳藻筆
躬耕之暇乃竊慕乎古人驅馳六義之途不忘
詠歌之道自謂操縵有素爲山將成稍成斟酌
異同綜覈今古遂叨藝苑見稱詞林不棄縉紳

先生下交白屋林丘高逸道合素風或千里而命駕或三逕以爲隣或以忘年誓好或以講討昵親仕隱存沒共凡一十四人並能發揮造化之微吐納風雲之氣綺縟燦煥珠璧圓融態變則魚龍並化韻諧則金石齊鳴故其灑翰託寄對酒賡和欣合怨離緣情體物投我篋笥積歲成多嘉靖戊戌之冬岱歸山居檢閱緘素手錄成編於是略加揀選又各贅述其才妙命爲今雨瑤華所謂德音不忘良有以也明年嘉靖己亥秋七月廿有七日岳岱謹序

今雨瑤華

鄴郡岳岱撰

崑崙山人張詩

五嶽山人黃省曾

憨泉山人袁昭暘

雨舟王濟

時川姜龍

桃谷陸俸

陽山湯儒

石川張寰

大石山人顧元慶

謝湖素駿

嵩山徐伯虬

九峻顧聞

少溪王延陵

青門山人沈仕

崑崙

右嘗千里定交講深三義篇章往復手錄
貽多乃謂鏤金刻玉咀鳳含麟或未滿其
平生尚何傷於雅調麗則之方豈遠乎也

湖上同王朱二子作

晨遊越西郭橫地丘壑重超遙冠雲霓廻合紛
芙蓉青冥洞晴湖豁達揮遠風積雪林未密陽
崖桃始紅菰蒲媚汀曲浮藻戲蜚鴻丹霞翳玄
壁瑤波涵玉峯陰嚴歛冬霰萬壑昭春容窈窕
旣莫述玲瓏亦難窮清時邁良景況將心賞同
逍遙謝涼薄永躡求羊蹤

遊嵩華值子還吳中賦贈

權棕眷春陶悽愴感秋別日子嵩華遊子亦返
吳越江海壯烟帆山川險轅轍雖殊水陸途共

抱辛勤轍風濤各一方雲壑每同月龍鶩迴莫
攀鳳舉渺難掣高情逸松喬孤懷挺倪缺遠遊
信昭曠獨往漸薄劣歷覽窮幽奇嶇嶇足怡悅
睽携何日并努力崇令節

碧雲寺與同遊諸翰院

招尋滄海寺探歷更雲梯蹤跡何嘗定登臨喜
復齊山應如鷲嶺水卽似曹溪願以金門句言
從碧巘題

又

白雲千仞地紺玉萬盤宮龍象香林外山河法

界中鯨鐘鳴雜鼓旌彩曳長虹不到諸天外那
緣五蘊空

都下贈秦餘岳子

山色隨龍劍何時別五湖風塵萬人裏鸞鳳一
身孤足躡烟霞展腰盤海嶽圖三秋今獨見莫
惜倒金壺

別友遊大嵬之山

疋馬翩翩沙磧西登攀縹緲碧雲梯寒宵直北
瞻辰極霞錦葱葱五色齊

又

蕭蕭寒月度龍城獨訪王猷叩竹扃不異剡溪
山雪夜掀髯長罄水晶瓶

贈荅秦餘寄山水圖畫

秦餘山人鸞鶴姿遙探江海躡靈芝醉圖萬疊
雲丘狀樹是琳琅瑤作池

五嶽

右情鎔李杜辭體梁陳遊覽之餘操觚靡
倦剪剔綺繡咀嚼瓊瑛每篇輟筆粲然驚
目物論不齊妙才難至斯文場之迅足詞
林之羽儀者也

五嶽之志滯不可解岳子遺詩見阻荅
以見志

少結箕穎懷況有玉臺志黃屋如飄塵青春乃
浮寄重以父母心屈體干祿位日月三十新奔
騰實流駟本爲丹丘鳳羣鳥噪而戲本爲南溟
鯤長苦螻蟻制五嶽搖予思日灑向長決親舊
豈不戀紈袴半相棄虎豹誠畏途舉世悉魑魅
決意求冥棲夙夜向山翠爲糧多華芝披襟有
仙吹鸞鶴真與遊雲霞果成類藉彼曦和光御
我三島轡緬爾採藥人千載得其意他日松桂

傍萬里夢高誼

泗洲寺

化塔曉言攀禪樓訪閉關烟生屯匝柳雲長合
前山御酒靈襟暢談經寶思間紺園星緯地淹
對不知還

張儀部維靜觴予朝天宮

綠殿枕丹丘珠林啓宴遊雨飛仙觀午雲入冶
城秋青鳥臨杯度長江抱席流國華逢上彦西
日任淹留

和栗子送張子遊北嶽

我嘯長安日君攀紫嶽雲餞琴揮鶴緒離劍把
星文傲掇金光草狂呼赤鯉羣桃花明月館千
里憶高芬

丹徒留侯廟

留侯有遺廟高枕碧江濤偶此白雲謁猶欽黃
石心椒漿秋一奠松子我將尋明月下孤棹蒼
蒼楊柳陰

遊清涼山

舊刹歡新陟涼臺得暖攀殿懸秋靄樹江吐夕
陽山法食供遊饌林杯悅旅顏無勞支遁馬碧

草步人還

荅東伯岳子山中見贈

隱尚貪成癖幽尋愛歷奇石門唯嶺帶蘿室有
花披歌好遊仙賦杯清問竹期子真君不愧谷
口慰相於

憨泉

右窮賤易安幽居無悶篤意盛唐詞旨清

美

同陸明府過陽山訪漳河岳山人

沉舟入西山炎景照南陸梅霖歇崇岡積澗合

林麓挈徒過修坂訪友臻空谷川薄陽已微烟
霏忽叢竹石竇注清冷雲蘿覆岩屋庖人饋鮮
鯉童子進鼎餼翰墨情所投令人發深穆茲會
難再洽良趾蘭堂宿

詠陽山草堂竹贈漳河岳山人

草堂正倚陽山曲裊裊琅玕澗水潄風塢籜辭
同蘚碧雲林梢長接空陰雨晴簾捲秋如許日
午開尊暑不侵過客留連盤石坐求羊應許更
攀尋

寄友客北都

高卧滄洲驚歲晚幽棲白晝自閑情山中麋鹿
逢人慣樹底鷗鳧戲浪輕修竹蒼蒼風閣倚浮
雲片片野堂明故人冀北傷千里忽聽關河朔
鴈聲

聞漳河岳子復入山讀寄書贈

一從胥小別負笈向青山遠謝塵囂跡言歸薜
荔關烟光池竹翠日氣巖花斑知是談經宅泉
聲盡日潺

雨舟

右居常好客耽接名流善托今辭邀歸古

意敷呈俊語理不虛談若和宮詞花藥難
稱獨步尤善諸體詞家其捨斯人嗟乎例
官別駕世寡識真及乎南坦劉公太白孫
子攸同雅社人其可知

雲山辭寄岳山人

雲山高兮高無極溪水深兮深不測山川杳隔
兮夜復長悵望山人兮增太息落花悲兮三春
暮芳草怨兮千里積貽蘭蒞兮不能忘攬芳馨
兮繫吾臆若有人兮山之阿帶杜衡兮服芟何
餐玉瑛兮弄瓊芳歲暮無媒兮柰爾何

時川

右天挺命世學無偏擅政理精詳神明愷
悌握兵南徼文身歸德民立生祠人稱韓
范國之利器考槃在阿故其縱志名山英
懷遠託巖情谷趣聊寓聲詩殆猶神龍出
淵風雲自異璞玉爲器瑚璉俱珍

夏日尋秦餘山人隱居

衡宇多倦燠沿汎滌塵煩竭來湖山隈遺彼觸
意根遙波旣蕩瀉垂柳復陰繁矯首快遐矚杖
策更登蘋念我山中友遁跡貫丘園秦餘鬱嵯
峨霞靄相吐吞雙松正當戶高竹翳周垣池藻
委紅艷綠葉風前翻主人枕書卧墊巾出候門
相對但一笑坐久澹無言新詩互相訂種植法
亦存幽尋貽俗誚此道古所悖

東門女

東門女如雲燦燦臨周道金鞭少年子買笑恨
不早出婦寡容輝被服無紈綺幽間時所棄真
姿向誰好恥逐衛女遊覩顏狎隣嫗不恨無人
憐但惜流光老冥鴻志高雲握馬懷豐草欲逝
無羽儀憂心怒如擣

桐江

桐江三百里步步山如畫上有白雲封下有哀
湍瀉開塢見桑麻人家竹相亞樹密鳥啁啾坪
欹花妖姪布帆去賣綠應接殊不暇江深不隱
魚地瘠還宜稼豈無遁世人難容俗士駕胡乃
富春翁獨擅高風價竭來慕隱淪山靈應不借

望夫石

妾身若堯峯望夫不遺瞬手欲攝蜚鴻冀得衡
陽信酸風裂素衣苦雨凋玄鬢却恨藁砧歸誰
入黃腸殉

登天湖山

天湖臺殿迴鳥路出人寰佛遠無新供僧閒自
古顏寒泉生石井垂蔦翳松關不緣殘照斂
詠未言還

登上天竺閣

欹閣倚危巔踈鐘破冥烟澗迴瑤帶合峰抱翠
濤連無復容塵地剛餘看月天想應風雨夜枯
坐更通玄

桃谷

右蚤登仕用無暇篇章晚就操觚遂超多

士靈心夙構穎悟居多朝夕苦吟已收時
論蓋能守約少陵之方博施唐人之作者
也

酌劉子古鏡

古鏡不自惜遙兼千里音懸之照肝膽奚啻雙
南金圓質凝精光螭盤古銘深明月入我懷聊
復理吾箴與君別幾時鬢髮雪已盈冉冉悲年
暮悠悠空陸沉願言保不缺報君久要心

至陽山訪岳山人

訪爾陽山曲迢迢丘壑重青冥恣遐矚麋鹿伴

孤蹤高枕低雲嶠踈林度遠鐘徑餘重九菊門
倚兩三松避地霧中隱鳴琴竹下逢夜長思共
醉老去願相從魏闕無今想仙風自可宗因思
沉酒者後後爾何庸

舍弟山亭

谷鳥喚人啼山人過竹西樹高將宿鳳江霽欲
生霓逕暖鶯花日風和燕子泥莫辭尊酒暮烟
相思

早春園居

魏闕天今遠陶園歲復新杖藜吾獨往芳草正

懷人雪意頻催酒鶯啼漸入春
聖朝多雨露
江畔老微臣

送友遊武夷

秋來天外結幽期一月看山到武夷
石壁負舟仙去後天風吹袂獨吟時
花深九曲烟霞寂月出千峯猿鳥悲
我亦江潮從孟浪聞君長往不勝思

除夕

病拋簪綬風塵外老媿詩名五十聞
華髮漸青鏡曉草堂重伴碧山雲
春歸柳岸啼新鳥歲

晚江村帶夕曛獨酌椒花燃栢子
閉門空自嘆離羣

陽山

右言論温温丰儀潔雅妙通玄學好托禪
門洞庭玄墓之山清齋獨宿堯峯四飛之
頂累月彌旬藹然交遊無深無淺山林之
妙罕覩其人昌穀貴其討論我輩珍其情
性其製作奚待余言

玉階怨

朱甍螢影度璧月綺疏流牛女年年會玉階今

夜愁

懷岳子

皎皎懸秋月耿耿照我堂仰觀星辰列飛鴈薄雲翔故人若天末遺音願相將良宵不我會涕泣久徬徨

送陸子玄遊泰山

神皋玉壘造天都天門日觀相吞屠跳丸日月籠中鳥海嶠微茫掌上圖七十二君垂窅渺六轡八駿非虛無嗟哉子玄茂陵豪風塵玉樹灑然高胸藏四瀆襟五嶽憑虛歛忽還離騷竭來欲訪蓬萊路紫簫綵鳳披雲霧會見飄飄凌太清何事悠悠空日暮

石川

古筭裘仕業蚤籍金閨文不背時用存博濟若夫綺錯刻鏤或因遲澁之愆捷疾豐饒蓋出神爽之妙久而致績者易造次成功者難况搦毫思速則風雲之色可觀謀篇步緩雖金玉其相奚取若石川者蓋詩場之驍將機敏而摧敵者乎

雲泉菴用少谷韻東秦餘兄

何地勝平泉茲山萬壑偏乾坤秋欲老登眺復
誰憐物象含幽洞湖光接遠天結廬棲二逸擬
共此逃禪

大石

右隱居草莽無局促之憂好歷名山盡道
遙之樂詞貴省潔意尚真古雖靖節田家
之言浩然江湖之句時代雖遠旨趣相符

爾

甘露寺

絕壁倚江濱千峯帶夕曛斷岡餘王氣古鑊隱

雷文滄海風烟接高城鼓角聞上方蕭索盡一
塔出塵氛

獻花巖

共討花巖勝雲霄肘腋傍牛峯雙角知天塹一
支長松殿秋陰肅經堂雨葉黃物華更娟淨時
序近重陽

山齋誦見寄之作有懷漳河

忽憶漳河子居然有道風一尊黃葉下數口綠
雲中鴻鵠心同遠岩丘興不窮新詩開大雅莫
惜寄郵崗

謝湖

右風儀秀朗才情超遠業雖科目志則清
真齋居晏然間遊山水文鄙近習典雅清
夷翰墨瀟灑林丘鬱映其於友于祿食寡
望洋之憂世俗趨卑茂隨波之態詳其詩
品德必有言

田家

田家何辛苦聽我歌此詞竭力隴畝間猶未免
寒飢東作駕言興傾家事耕耔赤日曝膚體風
雨無寧居焦勞望樂歲旱潦將何爲刈穫未云
畢里胥已相隨存餘有糠覈微歛仍責期縣官
無陽城鞭撻還嘻嘻假貸完公家寧顧妻子私
嗟嘆茅簷下堯舜安復知

其二

誰言田家樂所樂亦豈常耕歛稍不給豐歉復
相當五月了蠶事十月登稻梁所入不償用閒
少實多忙營營事公私勞苦過卽忘歲功已告
畢蜡社聚一方酌酒宰鷄豚鼓腹坐山陽寧知
朱門內晝夜羅酒漿貧富在所遭苦樂難較量

贈岳子

岳子事肥遯陽山開草堂清真辭紱冕白日傲
羲皇大雅今寥落新詩莫秘藏著書多歲月種
竹長琳琅

嵩山

右家尚箕裘才兼瑜瑾凡有體裁莫不源
委况其所得允合衆長靡珎綺錯之能無
傷真致之雅昌穀之文風斯不墜者矣

游仙

碧海浩無際丹丘雲霧邊中有抱一子仰吸朝
霞鮮放情思輕舉恍見雲中仙金匱傳丹藥玉
函授真篇玄螭駕日表霓裳襲我前願成九轉
火與相爾周旋

其二

海鼇不停運物化與時成微軀匪金石安能俟
河清蘭蕙王者香珠投疑暗生乘風願雲翔螭
居非我迎側聞緜山鶴夜夜徒悲鳴仙人王子
喬悵望緜雲屏

同九峻顧子訪漳河岳山人

多君接鄭圃玄室白雲陰此日逢迎處高天倚
對吟竹香明幌靜山色暮簾深相送情無限餘

音碧水琴

甲午元日

瑤極青陽獻璇宮紫氣氤晴光千障合陽脉百
泉分門戟開黃道臺書得慶雲青埽江柳染紅
入圃梅芬花頌迴三朔糕盤薦五辛春杯吹綠
酒不遺瘁顏醺

九峻

右才華瑋麗鋪敘豐長究其所埽靡不
有自如謝康樂出水之芙蓉顏光祿鏤金
而錯綵文質雖異擅名一揆至于染翰人

稱其能並美者矣

同徐子過岳山人

愛爾中林靜鶯啼下碧除風清徐穉榻花映鄴
侯書簾際涼露切城陰夏木虛論文竟西日片
片落璠琚

和岳子嵩山草堂宴集

綠剗覆滄浪高齋敞夕陽鳥殊聞法曲花故憶
明粧碧酒啣風急清琴拂水長况逢巖壑侶同
醉白雲傍

折楊柳

芳草接金堤垂楊綠更齊夕絮離天遠春絲別
霧迷曲中青鏡改愁畔紫騮嘶紅樓嘆少婦腸
斷玉關西

採蓮曲

蘭舟終日漾蓮溪少女如花錦袖低含笑折來
流水畔紅粧兩兩鏡中啼

又

岸上金羈白馬郎溪邊紅粉斷人腸臨風背摘
雙頭菜笑入荷花萬點粧

少溪

右文恪之子蔭補清要弗習純綺雅尚山
居刻意長吟未嘗懈怠宦遊南北歷覽山
川雅思清詞珠輝雲泄高明日造至止難
窮

滄洲漫興

沙白柳陰薄潮平舟揖輕天開雲錦麗人傍日
華行鷄犬村墟午鷗鳥杜若晴金尊開欲撫回
首憶神京

王太史張比部同登翠微閣

石磴千盤轉山樓百尺餘窓虛雲自入春暖柳

蔣舒玉竿浮金液
瑀欄俯碧虛
叨陪太史宴
辭賦媿璠璣

贈岳漳河先生

岳子秦餘隱不將
凡庶羣緬懷
丘中業恥屬世
人文解帶卧秋竹
彈琴棲海雲
昔賢真不媿
翹首挹清芬

虎丘分詠得浮圖

寶塔倚秋穹
珠林望綵虹
雲嘘網戶白
日落綺疏紅
鈴語振天外
龍光盤壑中
不有九霄陟
能令五蘊空

雨過崑崙草堂

城邊樹色淨幽居
三伏煩襟一暫舒
曩倩金門寧得似
子真谷口合應如
尊開冰雪輝輝映
簾捲烟霞黯黯虛
翥鳳蟠龍心景爾
衝泥騎馬慮非余

洪光寺同崑崙山人

洪光高閣杏林端
繚繞雙過錦繡鞍
曉日乍開仙闕曙
春雲猶弄上方寒
窓中猿墮青天影
樹裏人行赤玉欄
已分息機甘晏寂
長安風霧任漫漫

青門

右身本貴介志則清真野服山中江遊海
覽新篇雅調遠迤沓稱信乎野鶴之在雞
羣祥麟之遊郊外雖不登朝用豈失賢才
翰墨丹青兼能遊藝爾

村居春日

柳堰迷丹日蓬扉啓綠烟
人間啼鳥外興劇落花前
野色連三逕山光滿四筵
鸚鵡隨可解堪作酒家錢

出塞

符傳出葡萄星郎上郡豪
五營分貝胄萬騎擁
駢旄野日寒如月河水聚若刀
凶門隨命鑿仗勝有龍韜

詠白葡萄

靈芟秦地植珍賞漢宮傳迤邐
開丹圃縈迴架紫烟柔條綠葉上
芳實引絲牽浥露偷星彩含
秋借月鮮圓成鏤壁聚明作貫珠
懸薦食瑶盤映調漿玉液便應須
百縑重疇德有前賢

遊玉几山阿育王寺

梵帝西青境靈巖上巳辰
紅收行靄盡綠盡望

烟新寶剄分雙影龍泉吐九津露華凝瑞液日
彩上仙輪殿繞芝花秀堦垂貝果瓊蓮峯雲是
葉鏡水霧難塵暖溢恒河潤光生法界春空香
縈草木花雨散天人意府薰休旨形圖照勝因
曹溪原淨域何藉剪荆榛

陽山顧氏
刻梓家塾

今雨瑶華終

陽山顧氏
刻梓家塾

